



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

მოქვის საეპისკოპოსო



მოქვის ღვთისმშობლის
თაძარი

მოქვის საეპისკოპოსო, საქართველოს მართლმადიდებელი ეკლესიის ერთ-ერთი ეპარქია. დაარსდა X ს. მეორე ნახ-ში. მისი საკათედრო ცენტრი ოჩამჩირის მუნიციპ. სოფ. მოქვში მდებარე მოქვის ღვთისმშობლის თაძარი იყო. „მატიანე ქართლისაჲს“ ცნობით, მოქვის თაძარი აგებულია და კურთხეულია საკათედროდ „აფხაზთა“ მეფის ლეონ III-ის მიერ: „ამან აღაშენა ეკლესია მოქვსა და შექმნა საყდრად საეპისკოპოსოდ, აკურთხა და განასრულა ყოვლითა

განგებითა“. ლეონ III-ის მიერ თაძრის საკათედროდ კურთხევა IX-X სს. „აფხაზთა“ სამეფოში მიმდინარე იმ პროცესის შემადგენელი ნაწილია, როდესაც იქმნება ჭყონდიდის, ბედიის, დრანდის საეპისკოპოსოები. მთელი შუა საუკუნეების მანძილზე **მ. ს.** რელიგიის, კულტურისა და განათლების კერას წარმოადგენდა, ამდენად მისი ისტორია მჭიდროდ უკავშირდება ქვეყნის სოც.-ეკონ., პოლიტ. და კულტ. ცხოვრებას. **მ. ს.** საეკლესიო მიწისმფლობელობისა და სამამულო სისტემის, მისი, როგორც საეკლესიო-ფეოდალური სენიორიის შესახებ ცნობები არ არის შემორჩენილი.

მოქვის ეპარქიის მღვდელმთავარი ცნობილია მოქველის სახელით. თითქმის ყველა მოქველი მთავარეპისკოპოსის ხარისხს ატარებდა. ვახუშტი ბატონიშვილის ცნობით, მოქველთა სამწყსოს შეადგენდა ტერიტორია მდ. მოქვსა და მდ. კოდორს შორის. მოქველთა შესახებ ქართულ და უცხოურ წყაროებში ძალზე მწირი ცნობებია დაცული. X-XI სს-ში მოქველი მღვდელმთავრების შესახებ არაფერია ცნობილი. XII ს-იდან მოქვის კათედრაზე ჩვენთვის ცნობილია შემდეგი მღვდელმთავრები: მთავარეპისკოპოსი გრიგოლი (XII ს.), რ-ის სახელსაც უკავშირდება მოქვის სამრეკლოს აგება;

მთავარეპისკოპოსი დანიელი (XIII ს. ბოლოსა და XIV ს. დასაწ.), მოქვის ოთხთავის (1300 წ.) მომგებელი; მთავარეპისკოპოსი აბრაჰამი (XIV ს. I ნახ.); ამბრია მოქველი (XIV ს.); ლუკა ოძრხელი (XIV ს. 60-იანი წლები); მოქვის ოთხთავის კიდევ ერთ, უფრო გვიანდელ მინაწერში მოხსენიებულია მთავარეპისკოპოსი ფილიპე ჩხეტიძე (დაახლ. XV ს.); მღვდელმთავარი რომანოზი (XV ს. მიწურული), რ-იც თოფურიძეთა სასისხლო სიგელშია ნახსენები; საბა მოქველი (XV ს. მიწურული); მთავარეპისკოპოსი ელია, რ-იც მოქვის ომოფორის (ოლარის) წარწერის მიხედვით, მოქვისა და დრანდის კათედრებს განაგებდა; გრიგოლ მოქველი (მოქვის გულანის ერთ-ერთი მინაწერის მიხედვით XVI ს. 30-50 წლები); ეფთვიმე საყვარელიძე [XVI ს. 50-70-იანი წლები; მოგვიანებით აფხაზეთის (დას. საქართველოს) კათოლიკოს-პატრიარქი ეფთვიმე (ექვთიმე) I]; XIII ს. მარხვანის გვიანდელ მინაწერში (XVI-XVII სს.) ნახსენები ლაზარე მოქველი; ეპისკოპოსი ანდრია (XVII ს. 60-იანი წლები), რ-იც ტყვის სყიდვაში მონაწილეობის გამო ეკლესიიდან განიკვეთა; XVII ს-ში მოღვაწე იაკობ მოქველი, რ-იც უკანასკნელ მოქველადაა მიჩნეული. ამასთანავე, არსებობს ცნობები ისეთ მოქველებზეც, რ-თა სახელებიც უცნობია, მაგ: XVI ს. შუა ხანებში, დაახლ. 1557-60 შორის, იმერეთის მეფის ბაგრატ III-ის ინიციატივით მოწვეულ დას. საქართველოს საეკლესიო კრებას სხვა კათოლიკოსებსა და ეპისკოპოსებს შორის მოქველი მთავარეპისკოპოსიც ესწრებოდა, რ-ის სახელიც მითითებული არ არის. მსგავსი ფაქტი გვხვდება დოსითეოსის (შემდგომში, იერუსალიმის პატრიარქი დოსითეოს II ნოტარა) ჩანაწერებშიც – 1658 იერუსალიმის პატრიარქი პაისიოსი დოსითეოსთან ერთად ოდიშის სამთავროს სტუმრობდა. ამ უკანასკნელის მოგზაურობის ჩანაწერების მიხედვით, მათ უმასპინძლა მოქველმა ეპისკოპოსმა, რ-ის სახელი არ არის მითითებული.

1681 ოდიშის სამთავროს ჩრდ.-დას. ნაწილი მდ. კელასურიდან მდ. ეგრისწყლამდე (ღალიძგა) აფხაზეთის სამთავროს შემადგენლობაში მოექცა. თუმცა ამ დროს გაძლიერდა ჩრდ. კავკასიიდან მთიელების (აფსუების) ჩამოსახლება. მათ მიერ მიტაცებულ ტერიტორიაზე შეუძლებელი გახდა ქრისტ. ეკლესიის ფუნქციონირება, რის შედეგადაც დრანდისა და მოქვის საეპისკოპოსოები გაუქმდა. ვახუშტი ბატონიშვილი ამ ამბების შესახებ აღნიშნავდა: „გარნა იყო ჭირი დიდი ოდიშს, ვითარცა აღვსწერეთ, და უმეტეს აფხაზთაგან, რამეთუ მოვიდოდნაწ ნავეებითა და დაიპყრეს ვიდრე ეგრისის მდინარემდე, და დაემუნებოდნ თვით აფხაზნი და არღარა იყო დრანდას და მოქუს ეპისკოპოსნი“. საეპისკოპოსოს გაუქმების შემდეგ მოქვის საკათედრო ტაძარი დაცარიელდა და გაპარტახდა.

წყარო: მათიანე ქართლისა, წგ. ქართლის ცხოვრება, ს. ყაუხჩიშვილის გამოც., ტ. 1, თბ., 1955; ვ ა ხ უ შ ტ ი , აღწერა სამეფოსა საქართველოსა, იქვე, ტ. 4, თბ., 1973; საქართველოს სიძველენი, ტ. 1, ტფ., 1920; საქართველოს სიძველენი, ტ. II, ტფ., 1909.

ლიტ.: ა მ ი რ ა ნ ა შ ვ ი ლ ი შ., ქართული ხელოვნების ისტორია, თბ., 1961; ა რ ა ხ ა მ ი ა გ., სასისხლო სიგელთა შესწავლისათვის, თბ., 2017; ა ხ ა ლ ა ძ ე

ლ., აფხაზეთის ეპიგრაფიკა როგორც საისტორიო წყარო, I (ლაპიდარული და ფრესკული წარწერები), თბ., 2005; კ ა ლ ა ნ დ ი ა გ., ოდიშის საეპისკოპოსოები (ცაიში, ბედია, მოქვი, ხობი), თბ., 2004; ჟ ო რ დ ა ნ ი ა თ., მოქვის ეკლესიის (აფხაზეთში) ომოფორი ისტორიულის წარწერებით, „ივერია“, 1902, №92; სამეგრელო. ქართული კულტურის ისტორიის ქრონიკები. ნარკვევები, მასალები, ტ. 1, გ. კალანდიას საერთო რედ. თბ., 2025; ს ი ლ ო გ ა ვ ა ვ., სამეგრელო-აფხაზეთის ეპიგრაფიკა, თბ., 2006; ხ ო რ ა ვ ა ბ., ოდიშ-აფხაზეთის ურთიერთობა XV–XVIII სს., თბ., 1996; ჯ ო ჯ უ ა თ., მოქვის უცნობი ეპისკოპოსი ლუკა ოძრხელი (1360-იანი წწ.) და მისი ხუთი მინაწერი XII საუკუნის გარეჯული კრებულის (Ven. 4-ის) აშეიბიდან, კრ. ისტორიულ-ეთნოგრაფიული შტუდიები, VI, თბ., 2003; К о н д а к о в Н., Описание памятников древностей в некоторых храмах и монастырях Грузии, СПб., 1890; Р ч е у л и ш в и л и Л. Д., Купольная архитектура VIII–IX веков в Абхазии, Тб., 1988.

ბ. ხორავა
